



Fidoyilik —
Vatanga xizmat demak!

2024-yil 3-oktabr, payshanba,
114 (23.991)-son

**KUN
HIKMATI**

Har qanday
odillik ham
qonundan
kuchli bo'la
olmaydi

1913-yil aprel oyidan chiqib boshlagan



www.zarnews.uz <https://www.facebook.com/zarnews.uz> [@zarnews_uz](https://twitter.com/zarnews_uz) https://twitter.com/zarnews_uz

“Ipak yo‘li” turizm va madaniy meros xalqaro universitetida YUNESKO kafedrasini ochildi

↓ *Xalqaro anjuman*

“Ipak yo‘li” turizm va madaniy meros xalqaro universitetida “Ipak yo‘li moddiy-madaniy merosini o‘rganish va saqlashning dolzarb masalalari” mavzusida birinchi xalqaro ilmiy-amaliy simpozium o‘z ishini boshladi.



YUNESKOning O‘zbekistondagi vakolatxonasi hamda “Ipak yo‘li” xalqaro tadqiqot instituti hamkorligida tashkil etilgan anjumanda Ipak yo‘li bo‘yida joylashgan 20 ga yaqin mamlakatdan restavrador va olimlar, arxitektura sohasida faoliyat yuritayotgan mutaxassislar Ipak yo‘li moddiy-madaniy merosini tadqiq etish, ta‘mir-lash, muzeylashtirish va ommalashtirish borasida tajriba almashmoqda.

Anjuman ochilishida YUNESKOning O‘zbekistondagi vakolatxonasi rahbari Sara Noshadi, «Ipak yo‘li» turizm va madaniy meros xalqaro universiteti birinchi prorektori Dilmurad Nasimov, “Ipak yo‘li” xalqaro tadqiqot instituti direktori, Mavluda Yusupova ishtirok etib, simpozium ishiga muvaffaqiyat tiladi.

Shundan so‘ng Ekologiya, atrof-muhitni muhofaza qilish va iqlim o‘zgarishi vaziri, «Ipak yo‘li» turizm va madaniy meros xalqaro universiteti rektori Aziz Abduhakimovning konferensiya ishtirokchilariga tabrigi o‘qib eshittirildi va yurtimizda moddiy madaniy meros obyektlarini asrab-avaylash borasida amalga oshirilayotgan ishlariga to‘xtalib o‘tiladi.

Ta‘kidlanishicha, mamlakatimizda hozirgi kunga qadar 8210 ta moddiy madaniy merosning ko‘chmas mulk obyekti davlat muhofazasiga olingan. Ularning 4788 tasi arxeologiya, 2265 tasi arxitektura obyektlari, 625 tasi monumental san‘at asarlari, 530 tasi diqqatga sazovor joylar hisoblanadi. Madaniy meros obyektlarini ta‘mir-lash va tiklash nozik jarayon bo‘lib, bunga o‘z ishinig mutaxassislari, ya‘ni yetuk xalq ustalari, xorijlik mutaxassislar jalb etilmoqda.

Oliy ta‘lim muassasalarida arxitektura yodgorliklari rekonstruksiya va restavratsiyasi, muzeyshunoslik, arxeologiya ta‘lim yo‘nalishlari bo‘yicha kadrlar tayyorlanmoqda.

– Samarqand azaldan uzoq yillik o‘tmi-shi, bir necha asrlik tarixiy obidalarga boyligi bilan dunyoga mashhur, – deydi Sara Noshadi. – Shu bois ilk xalqaro simpoziumni ko‘hna kentda tashkil qildi. Mazkur anjumanda arxitektura va arxeologiya yodgorliklarini konservatsiya, restavratsiya qilish va muzeylashtirish tajribasi hamda moddiy-madaniy merosni saqlash va ommalashtirishning zamonaviy usullari mutaxassislar tomonidan muhokama etilib, eng yaxshi loyihalar Ipak yo‘li bo‘yida joylashgan mamlakatlar moddiy-madaniy merosini saqlab qolish uchun amalda tatbiq etiladi.

Konferensiya doirasida “Ipak yo‘li” turizm va madaniy meros xalqaro universitetida YUNESKOning Ipak yo‘li bo‘ylab barqaror meros turizmi kafedrasini ochildi. Ushbu kafedrani tashkil qilishdan maqsad Ipak yo‘li-moddiy madaniy merosini, jumladan, mamlakatimizdagi moddiy va nomoddiy madaniy meros obyektlarini asrab-avaylash hamda turizm imkoniyatlarini kengaytirishdan iborat, – deydi ushbu kafedra hamraisi, tarix fanlari bo‘yicha falsafa doktori, dotsent Mastura Siddiqova. – Shuningdek, yurtimizga kelayotgan sayyohlar oqimini oshirish, xalqaro universitetlar professor-o‘qituvchilari hamkorligida kadrlar tayyorlash, grant loyihalarni amalga oshirish va turizm mahsulotlarini ko‘paytirish rejalashtirilgan.

F.RO‘ZIBOYEV.



PAST DARG‘OMDAGI MAKTABLARGA

10 mingta kitob sovg‘a qilindi

O‘qituvchi va murabbiylar kuni bayrami tadbirlari Past Darg‘om tumanida o‘zgacha nishonlandi. Dastlab tuman markazida “Uch avlod uchrashuvi” o‘tkazilib, faxriy o‘qituvchilar, faollarga hurmat-ehtirom ko‘rsatildi.

So‘ngra tuman rahbarlari va faollar ishtirokida Paxtakor mahallasidagi 104-umumiy o‘rta ta‘lim maktabining 210 o‘rinli, Qo‘qoni mahallasidagi 20-maktabning 180 o‘rinli qo‘shimcha binosi foydalanishga topshirildi. Investitsiya dasturi asosida bunyod etilgan mazkur obyektlarning har biriga 1 milliard 800 million so‘mdan ortiq mablag‘ sarflandi.

Mehmonlar yangi binolarda o‘qituvchi va o‘quvchilar uchun yaratilgan sharoitlar bilan tanishdi.

Furqat mahallasida 3-maktabgacha ta‘lim tashkilotining 150 o‘rinli yangi binosi, Oq oltin mahallasida “Kelajak” madaniyat markazining ochilishi, 97- va 114-umumiy o‘rta ta‘lim maktablarining qo‘shimcha o‘quv binolari ham pastdarg‘omliklar uchun

bayramga chinakam sovg‘a bo‘ldi.

Tuman sektor rahbarlari, tashkilotlar yetakchilari maktabgacha va maktab ta‘limi bo‘limida maktablar uchun kitob sovg‘a qilish tadbirida qatnashdi. Rahbarlar tomonidan tumanidagi umumiy o‘rta ta‘lim maktablari uchun o‘n mingga yaqin badiiy kitob sovg‘a qilindi.

– Agar har bir rahbar yoki maktablarning sobiq o‘quvchilari o‘zi o‘qigan ta‘lim dargohiga kitob sovg‘a qilishni odatga aylantirsa, maktablarimiz kutubxonalari kitobga to‘lib ketadi, – dedi Past Darg‘om tumani hokimi Sh.Rahmonov. – Buning natijasida o‘quvchilarda kitobga mehr uyg‘onadi, muhimi, bu an‘anani farzandlarimiz ham davom ettiradi.

Tadbirlar doirasida tumanidagi Samarqand mahallasida har biri 48 xonadonli 2 ta ko‘p qavatli uy foydalanishga topshirildi.

O‘qituvchi va murabbiylar kuniga bag‘ishlangan bayram tadbirida tuman hokimi Sh.Rahmonov ustozlarni tabriklab, ularning zahmatli mehnatlarini e‘tirof etdi. Bir guruh soha fidoyilariga “Xalq ta‘limi fidoyisi”, “Xalq ta‘limi a‘lochisi” ko‘krak nishonlari, tuman hokimligining faxriy yorliq va esdalik sovg‘alari topshirildi.

B.MUSTANOV.

GAZETA O‘QIYAPSIZMI? OILANGIZ – CHI?



Zamon zayli ekan, deb faqat telefonga qarab qolmayapsizmi?

“Zarafshon” va “Samarqandskiy vestnik” gazetalariga 2025-yil uchun obuna boshlandi.

Obunani tahririyatdan rasmiylashtirsangiz, mablag‘ni tejaysiz! Ishonavering!

Murojaat uchun telefonlar:

(66) 233-91-51, 233-91-55

↓ *Kun mavzusi*

72 ming gektar maydon, 2228 fermer xo‘jaligi va 271 ming tonna xomashyo. Bu raqamlar viloyatimiz dehqonlarining joriy yilgi paxta xomashyosi yetishtirishi bilan bog‘liq. Paxtakorlarimiz tomonidan yetishtirilgan hosilni yomg‘irli kunlarga qoldirmasdan terib olish uchun viloyat bo‘yicha 137 mingdan ortiq terimchi va 48 ta terim mashinasi jalb etilgan. Viloyat paxta shtabi ma‘lumotlariga ko‘ra, terimchilar yordamida kuniga o‘rtacha 1035 tonna, mashinalar ko‘magida kuniga 28,8 tonna paxta xomashyosi terib olinmoqda. Yaqinda yana 3 milliard 650 million so‘mdan bo‘lgan “Boshiran 4mz-4s” terim mashinalaridan lizing asosida 12 dona olib kelingan.

Paxtaning terimi va to‘lovida qanday o‘zgarish bo‘ldi?



– O‘tgan yilgi natijalar bilan solishtiradigan bo‘lsak, xomashyo yetishtirish bu yil 6 ming tonnaga ortgan, – deydi viloyat qishloq xo‘jalik boshqarmasi bosh mutaxassisi Asliddin Po‘latov. – Bu avvalo, tajriba, qolaversa, xorijdan keltirilgan hosildor navlarning ekilishi bilan bog‘liq. Bu yil dehqonlarimiz doimiy ekiladigan mahalliy navlar bilan bir qatorda viloyatimizdagi 9 ta paxta klasteri tomonidan paxtaning 7326 gektar maydonda xorijdan keltirilgan “Xinluzao-78”, “Xinluzhong 55”, “Shuangmian 509”, “MAY 505”, “MAY 455”, “Elize” navlari yetishtirildi. Hozirgacha 46,4 ming gektar maydonda birinchi terim ishlari yakunlangan bo‘lsa, yana 700 ga yaqin fermer xo‘jaligi tomonidan 13,5 ming gektar maydondagi hosilni terib olishga endi kirishiladi. Joriy yilda maydonlardan o‘rtacha hosildorlik 37,5 sentnerni, xorijdan keltirib ekilgan maydonlarda esa 39-41

sentnerni tashkil etishi kutilmoqda. Joriy yil 30-sentabr holatiga ko‘ra Kattaqo‘rg‘on (29,4 ming tonna), Narpay (30,1 ming tonna), Paxtachi (22,6), Ishtixon (23,3), Payariq (25,5), Past Darg‘om (42,8 ming tonna) tumanlarida belgilangan rejaning uchdan ikki qismidan ortig‘i, viloyat bo‘yicha 172 ming tonnadan ortiq hosil terib olingan.

Joriy yil viloyatimizda qo‘lda terilgan bir kilogramm paxta xomashyosi uchun 1500 so‘mgacha, mashina terimi uchun tonnasiga 1250 so‘mgacha haq to‘lanmoqda. Klasterlar tomonidan fermer xo‘jaliklari yetishtirgan xomashyoning tonnasiga 6800 ming so‘mdan qabul qilayotgan bo‘lsa, tayyorlangan har tonna xomashyo uchun davlat tomonidan bir million so‘m subsidiya berilishi evaziga paxtaning tonnasiga uchun xo‘jaliklar umumiy hisobda 7800 ming so‘mdan haq oladi.

O‘.XUDOYBERDIYEV.

Oyiga 10 million so‘m daromad

“Bundan to‘rt yil avval otam olamdan o‘tdi. Onam ishsiz edi. Men esa yosh. Oilada to‘rt qizdan keyin yolg‘iz o‘g‘il, kenja farzand o‘zimman. Shuning uchun ham ro‘zg‘or tebratishni zimmamga oldim. U yer-bu yerda ishlab, pul topsam, xursand bo‘lardim. Ko‘p qiyinchiliklarni boshimdan o‘tkazdim”.

Paxtachi tumani Farovon Yo‘ldoshobod mahallasida yashovchi Otajon Allamurodov boshidan kechirganlari va qiyinchiliklarni qanday yengib o‘tayotgani haqida gapirib berdi.

– Kunlarning birida hunarmand mahalladoshimiz Siddiq aka meni shogirdlikka taklif qildi, – deydi u. – Bu taklifni jon deb qabul qildim. Temirdan darvoza, eshik, so‘ri va boshqa jihozlar tayyorlashda ustozga yordamchi bo‘ldim. 6 oyda bu hunarni ipidan-ignasigacha o‘rgandim. Ustozning aytishicha, hozir yaxshi usta bo‘lib yetishibman. Kelgan paytimda bir oylik ish haqim 3 million so‘m atrofida bo‘lgan bo‘lsa, bugungi kunda oyiga 10 million so‘mgacha daromad topayman.

Otajonning ustoz Siddiq Irisqulov asosan mahalladagi ehtiyojmand oilalar farzandlari, ishsizlik muammosidan qiyalayotgan yoshlarni shogirdlikka taklif



qiladi. Sababi o‘zini ham bir paytlar aynan shu masala qiynagan.

– Avtomobillarga texnik xizmat ko‘rsatish yo‘nalishidagi kollejni tamomlaganman, – deydi hunarmand Siddiq Irisqulov. – Mutaxassisligim bo‘yicha ish

↓ *Kambag‘allikdan farovonlik sari*

topolmay xorijga ketdim. U yerda ham pul topish oson bo‘lmadi. Qaytib kelib, darvoza yasaydigan ustaga shogird tushib, shu hunar sirlarini o‘rgandim. O‘tgan yili mahallamizdagi hokim yordamchisi maslahati bilan 100 million so‘mlik imtiyozli kredit olib, alohida ustaxona tashkil qildim. Bir qancha shogirdlar tayyorladim, ularning aksariyati kam ta‘minlangan oila farzandlari edi. Bugungi kunda ular bu hunarni o‘rganib, alohida ustaxona tashkil qilgan. Ayni paytda Otajon bilan birga ishlayapmiz. Qiziquvchi yoshlar bo‘lsa, ularni shogirdlikka olishga, bilganlarimizni beminnat o‘rgatishga tayyormiz.

Otajon Allamurodov ham ustoz kabi alohida ustaxona ochib, shogirdlar tayyorlashni rejalashtirgan. Shuningdek, zamonaviy uskunalar sotib olib, metalga ishlov berishning murakkab jarayonlarini ham amalga oshirishni, yaqin atrofda faoliyat olib borayotgan hunarmandlarga yarim tayyor mahsulotlar yetkazib berishni maqsad qilgan.

To‘liqin SIDDIQOV,
Baxtiyor MUSTANOV (surat).

